

O LE SULU SAMOA



EKALESIA FAAPOTOPOTOGA KERISIANO SAMOA

O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA


SETEMA 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O TOA PENISIONE EFKS UA MAPU I LE NUU MONI



SOLOMONA TUATAGALOA FT



UELE LOTU UELE FS

FEAGAIGA EFKS CANELY VALE



FAUFAU SEILALA LUAMANUVAE



FAASAO MAA FS & IRONA

FAASINO UPU

1. O LE LAUGA	2
2. TALA'AGA O TOA EFKS	4
3. NA O AFIGA E TULEI MAI	6
4. MEA'AI E TATAU MALE ASO	10
5. OSIFEAGAIGA EFKS CANELY VALE	15
6. O E UA FAI I LAGI FOLAUGA	15
7. FAASA'OGA O ATA	15
8. ATA O LE AU FAAU'U 2020	16
9. ATA O E UA FAI I LAGI FOLAUGA	16

O LE LAUGA

Tusi Faitau:

F. Tuai: Kenese 1: 1 – 3; F. Fou: Ioane 1: 1 – 3.

Matua: *“Sa soona nunumi le lalolagi ma ua gaogao, sa ufitia foi le moana i le pouliuli, se fegaoioiai foi le Agaga o le Atua i le fogatai..” Kene.1.*

Manatu Autu: **O le Malamalama i Totonu o le Pouliuli.**

Ia tumau pea le viiga, le faamanū ma le faaneetaga i le Atua, ona o Lona alofa ma Lona agalelei i luga o Samoa nei, mai lava i ona ao se'ia oo i ona i'u, auā e ui ina ufitia le lalolagi i ao pogisā o le faama'i o le Koviti-19, tainane foi o mala faalenatura o aafia ai nisi atunuu o le lalolagi, ma le lē mapu foi o taua ma misa, a o loo i ai pea Samoa i lalo ifo o Ona aao alofa. Ioe, o sina manatu lea i le faama'i ma itu i taua ma misa ua lē afatia ai si o tatou atunuu.

Peitai, e mafai ona tatou faapea ane, se'i vaganā ai loto ma agaga ua lē mautonu i lenei vaitau, ona o lafoga mamafa, tautuuai, o le tusitusi lima, ona o le pule soona fai ma le loto faamaualuga, ua matuā fenumia'i ai loto ma agaga; ma ua faagaogaina lava foi i ni manatu ma lagona faaleatua ua nunu ai le to'au ma ua tauau ina soloia ai le nofo lelei o aiga ma nuu ma ua oo lava i Ekalesia Kerisiano, tainane foi o le EFKS, le tu'ua'ia i le tete'e ma le lē faalogo i le pule tutasi, ina ia suia ai lava faavae o le Ekalesia. O le upu moni lea, ma ua foliga mai ua toe tau ufitia manatu ma lagona i le pouliuli ma le pogisā. Peitai ane e ui i lea, ae tumau pea le loto faafetai i le Atua, ona ua tatou aulia mai lona 190 tausaga, o tumau le pupula malamalama o le Tala Lelei a le Atua ma suluia ai Samoa i le 1830. Ma ua ao ai lava Samoa, ua mafai ai ona maua le nofo lelei faauso moni, auā

ua tu'ua le fefulituaa'i ma le ola fe'aina'i, o le ola taulamalama ma le taufaaleaga i na aso o le pouliuli ma le pogisā o tu faanuupō. A o le fesili lava lea e tupu a'e pea i le loto – Sa faapefea ona mafai e tagata Samoa ona talia gofie le Tala Lelei? Sa faapefea ona uma i ia taimi o taua ma misa? Ae tainane o le valoaga a le tamaita'i o Nafanua ia Malietoa – E tali i lagi se ao o lona malo? E manatu lava o lea ua tali le Tusi o Kenese, *“Na faia e le Atua le lagi ma le lalolagi i le amataga, sa soona nunumi le lalolagi ma ua gaogao, sa ufitia foi le moana i le pouliuli, na fegaoioia'i foi le Agaga o le Atua i luga o le fogatai.”*

Ioe, o le Agaga lena o le Atua na amataina le tala faasolopito o Samoa – Samoa sa le'i mautū ni ona tulaga ma taeao, a o lea na faia ma amata e le Atua, ona ua loa ona fegaoioia'i ai Lona Agaga i luga o le pogisā, le fenumia'i ma le gaogao sa i ai. Le agaga o le malamalama lea na amata faavaeina le LMS i Peretania i le 1795, ma auina mai ai ana misionare i le Vasa i Saute, ma o le Agaga foi lea na fa'aauau mai ai e Ioane Viliamu ma Papu, ma misionare Tahiti e to'avalu le talaiga mo Samoa nei. Ae silisili ai le fegaoioia'i o lea lava Agaga o le Atua ia Samoa ma ona tagata. Auā sa faapea ona tali lelei tagata Samoa i le Savali o le Filemu ma ona tagata. Amata mai lava i le 'au alo-atu i Sasina o e na ta'u ane le taua o le Faatasiga o Aana ma lona i'uga – ua fasia Tamafaiga. Na faapea ane ai Puaseisei, 'Ua mate le tevolo.' Ae a le talileleia i Safune ma le uluai tatalo na saunia ai? Ioe, o faamaumauga lava o le Tala Faasolopito, seia oo mai i gatai o Sapapalii. Na faapefea ona tutupu ia mea ma talia filemu le Tala Lelei? O le Agaga o le Atua ua loa ona galueaina o loto ma manatu sa i le pogisa. Lea lava ua tu'umatamaga ma tulaga lelei ai o lagona sa fenumia'i, ma ua faatumulia o loto i le malamalama sa matuā gaogao'i i le pouliuli.

O lena, o la Malietoa e pei o ia talatuu – 'O le a tuua taua ma misa ae faasaga e ola i le Tala Lelei. Taatia sailiga pule ma mamalu, ae ola i le loto maulalo ma le agamalū e pei ona a'oa'o mai le Tusi Paia. Ioe Samoa, na o le Atua o le ola sa i ai a o le'i i ai se mea e tasi, e pei ona fegaoioia'i ai Lona Agaga, ma o le malamalama lea o le ola, e pei ona Ia fetalai i ai, *‘Ia malamalama, ona malamalama ai lea.’* Samoa sa matagā i le pouliuli, ua matagofie e pei o Etena. Ma o le matagofie lea o le malamalama sa sapi ma 'ae'ae ai tagata i na ona po, tainane e oo mai lava i lona 190 tausaga lenei o le Tala Lelei. O le upu moni lea, e ao pea ona faafoi le viiga i le Atua ona o lea.

Ae pei lava ona toe tau faaofiofi mai le pogisā ma le pouliuli, o feupuaiga ma tautuuāiga e isi o isi. O le fa'aalia o le pule soona fai ma loto faamaualuluga, tainane o ni tulafono ua tauau ina fevaevae'i ai Samoa. Peitai o Samoa ua uma ona tofi. E oo lava i le valaauina ua mau faailoga i le poto i soo se itu e oo lava i tofi o Ekalesia. Peitai a manatu lava i le pogisa, o loo tautala foi le Tusi o Kenese i lea faapogisaina, e pei ona faatauasoia ai Atamu ma Eva, ma pupula ai o laua mata. O la le gata, a aai i le fua o le laau faasaina, ona aveā lea o la'ua e pei o ni atua. Ioe, ua lē talia le malamalama o le ola o loo ia te i la'ua, ae ua fia ola i le pouliuli ia pule e pei o Ia. O vaivaiga ia na toe ufitia ai i la'ua i le pouliuli tele, ina ua faasaina i la'ua e le Atua. Le malamalama lea na susulu mai ae o la lalafi ona ua la iloa lo la'ua lē lavalavā.

O lena, e fiu le tagata e lafi i le mea pogisa, ae saili mai lava i ai le malamalama o le Atua. Le malamalama saili mai lena o le Atua na filifilia ai Isaraelu ia fai ma ona nuu, latou te faasusulu atu lea malamalama i le lalolagi. Peitai la le tala faasolopito o Isaraelu, na tele le pogisa ma le pouliuli na iloa ai, o le ola lea i tu ma aga faapaupau, lē faalogo i ana auauna ma ana perofeta o e sa taumafai e ta'u atu pea le malamalama o le Ola pe a talia le Agaga o le Atua, ae 'aue le faalogo i le pule ma le malosī faaletagata ma faalemalo mai isi atunuu. Ua na o se faamanatu i ia itu – Isaraelu ma ona ituaiga e sefulu, na faatoilalo e Asuria i le TLM 722; o sa Iutā na olopalaina e Papelonā i le 590-760. Leitioa lava alaga le perofeta o Isaia, 60 *'Tula'i ia, ina malamalama ia, auā ua oo mai lou malamalama.*' Tainane foi fai mai Sakaria, *"E lē o le fitafita, e lē o le malosī, a o lo'u Agaga."* E fiu le pogisa e tau faatoilalo le malamalama o le Atua, e lē mafai ona manumalo i ai. Auā o le Atua soifua e ou le pule aoao ma le mana, e na te pule i soo se gasologa o le taimi ma tausaga. Ma o lea lava na la silafia ua tauau lava ina ufitia le lalolagi i le pouliuli ma le pogisa o le agasala, lea lava na la toe amata ai lana foafoaga fou, o lana feagaiga fou foi lea, e ala ia Iesu Keriso.

O le malamalama moni lea – auā o la lava o le Atua ma Lana Upu Paia, na fegaoioia'i lona Agaga i luga o le fogatai ma fetalai ane, *'Ia malamalama'* ona malamalama ai lea; ma o le malamalama lea o le ola, e fiu lava le pouliuli e te'ena ae manumalo lava pea. Ioe Samoa, ua tauau ina toe fenumia'i ma gaogao lo tatou atunuu i nei aso, ona ua malosī mai lava le pouliuli o le loto fefete ma le faamaualuga, le saili i le

pule ua leai se manatu ane i isi ma o latou lagona, o aiga foi ma latou tofi mai le Atua ua tauau ina pulea e nuu ma afioaga, tainane foi o upu mamafa ua folafolaina solo a o faafofoga le atunuu – a o gagana tuu sa'o o aso uma, ua faavevesi ma fesoua'iina ai manatu ma lagona, ma ua oo lava i le Ekalesia ma ona ta'ita'i ua tuua'iina e le gata i le malo, a o ona faavae ma ana a'oa'oga.

O le soifua foi o tagata uma o le Ekalesia i lana tautua ma auaunaga masani, ua faitioina lava ma faifaiupu i ai. Ia faitalia ia i latou ma latou tuuaiga. Ae pau le mea ia tatou manatua – o le a le fenumia'i, le gaogao ma le pouliuli o tulaga na tatou fetaia'i, sa na o le Agaga lava o le Atua soifua sa i ai i ia itu mamate uma, ma sa manumalo lava lea malamalama i tagata i aso uma. Le malamalama lea o le Atua na pupula i loto ma agaga o nai tua'ā ua mavae, na ala ai ona faataatia le faavae mo le atunuu – E faavae Samoa i le Atua. Le Atua na fegaoioia'i lona Agaga i luga o tatou pogisa i le 190 tausaga ua mavae. Na talia fiafia ai ma le filemu le Tala Lelei. A o lea lava foi le malamalama tatou te manumalo ai pea - pe a taumafai mai le tiapolo ma lona pouliuli e faaleaga i tatou. Le malamalama tatou te maua ai le loto tetele - tatou te tutumau ai pea i Lana Tala Lelei - poo a lava faigata ma fita e fetaia'i ma tatou - ina ua tatou mautinoa, o la lava na te le tuulafoa'iina i tatou, a o loo la afio tumau ma i tatou i aso uma.

Ioe, e le toilalo le malamalama i se pouliuli, e pei ona sa le faafiti Iesu i le mataga ma le tiga o le satauro, ae na la aga atu pea i ai ma maliu ai, aua oe ma a'u ia toe avatu i le malamalama o le ola fou, e pei ona pupula mai luga o le satauro a o la fetalai, *'Ua fai lenei mo oe.'* Ae a lo tatou toilalo lena ua la aveesea le toilalo i le pogisa o Atamu ma Eva, le na lava i la le aposetolo o Paulo, *'Ona o le tagata na oo mai ai le oti, peita'i foi ona o le tagata ua na toe aumaia le ola fou.'* Le toilalo popo lena o le alii o le pouliuli - ina ia susulu mai le malamalama o le ola mai le tuugamau ua avanoa. Le Alii o le malamalama, le Alii o le ola, ua toe soifua mai nai e ua oti. A o la lava foi na fetalai - a outou fetaia'i ma ia mea (soo se mafatiaga ua faapogisaina ai lo outou ola), *'Ia outou loto tetele, aua ua ou manumalo i le lalolagi.'* Ia tumau i le malamalama moni o le Atua, ona tatou manumalo ai lea i le pogisa. Ma ia ia te la le viiga e faavavau. Amene.

*Saunia e le susuga Nukulaelae Iati FS
EFKS Samusu, LOTOFAGA LEPA & ALEIPATA.*

TALA'AGA O TOA EFKS PENISIONE UA MAPU ATU..

SOLOMONA TUATAGALOA FT

(15/5/1945 - 9/8/2020)

- 15 Me 1945** **Fanau i Vailoa-tai, Am. Samoa**
Tama - Pisia Solo, Tina - To'asavili
A'oa'o'ina: Samoana High School
1968-1971 Kolisi Faafaifeau Malua. Galue i le Samoa Times, Amerika Samoa.
1972 Faa-misionare i le Atu Maresala, na amata i totonu o le aoga Rongrong High School.
- 26 Iuni 1973** **Faaipoipo ia Annedy Milne-Tuatagaloa** i Rita Majuro, Marshall Is.
Fanau (6): Merosalita, Solomona Jr, Ispisia, Christianity, Annetha, Helen.
24/7/1975 Valaauina EFKS Lalomalava, Pulega Safotulafai, Matagaluega Faasaleleaga.
1989 - 1996 Komiti Tupe, Faasaleleaga
2001 - 2007 Komiti Feau Eseese
2008 - 2016 Tofia Toeaina Pulega Safotulafai
2016 @ Fono Tele Penisione ina ua 70 tausaga, ae 44 tausaga tautua i le EFKS.
- 9 Aokuso '20** **Maliu ina ua 75 tausaga, 2 masina, 25 aso o le soifua.**
23/8/2020 Sauniga Faaleaiga, Taitai-Siolo Tauati FT
24/8/2020 Toe Sauniga, Maota Maliu Sefo Pa'u i Tafaigata, ma Faaliu Efuefu ai. Taitai - Muao Su'a FS.

Na ta'ua e le susuga Muao Su'a FS EFKS Vaitele-uta, o le molimau foi lea a le Tina ia Annedy e faapea, o le Aso Sa Tamā 9 Aokuso 2020 na fai ai le aitema o faafiafiaga faaleagaga a tamā uma o le Ekalesia, sa taitai e le toeaina. O le taimi na faatino ai le faatoesega, na ia fai atu ai i tamā uma ina ia ifo atu i le faapotopotoga. A o sauni le mafutaga tama e fai le faatoesega, ae faate'ia loa le tapuaiga i le pa'u faafuase'i ifo o le pulelaa faitau Tusi Paia faatasi ma le toeaina o pipii ai, ua matapogia; sa taumafai atu togafitiga o fesoasoani muamua, ma auina atu ai i le maota gasegase i Motootua, peita'i na maliu lava o ia i le ala e le'i oo i le falema'i. E le tupu soo lenei mea - o le valaau mai o le Atua i se faifeau o loo faatino le galuega, o loo tala'i atu le finagalo o le Alii o Iesu ina ia salamo ma faaolaina nisi, o loo la'ei i ona ofu sisina i totonu o le malumalu, i le Aso Sa paia o le Alii.

(faauma itulau 14)

UELE LOTU UELE FS

(13/10/1947 - 2/9/2020)

- 13/10/1947** **Fanau i Falefā** (Tamā - Uele Iese Uele FS, Tinā - Aunua Talitua Samoa Liuteine)
1953-1967 Aoaoina: Falefā Primary, Anoamaa Secondary, SDA Lalovaea, Kolisi Samoa
1968-1969 Kolisi Sanele (Head Boy, S.C, UE)
1970-1974 Galue Ofisa Palemia, Ofisa Fono Fai Tulafono
1974-1978 Failautusi Ofisa Pulea Taavale Afi (Transport Control Board)
- 27/2/1976** **Faaipoipo ia Ane Fesuiaina Aii Leasuasu-Uele(Utuali, Saanapu, Salua Manono)**
1979-1985 Ofisa Pulea Laisene Taavale, Matagaluega Fela'uaiga Samoa (MOT)
1985-1986 Sui Failautusi, Matagaluega Felauaiga Samoa (MOT)
1986-15/2/89 Failautusi Aoa, Matagaluega Felauaiga Samoa (MOT)
1989-1992 Kolisi Faafaifeau Malua
(1992 Failautusi Mafutaga A'oa'o & Faletua)
1992-1995 Failautusi Fesoasoani EFKS, Ofisa Tutotonu EFKS
1995-2017 Faifeau EFKS Vaiala, Pulega Vaimauga Sasa'e, Matagaluega APIA SASA'E
Failautusi Fono Aoa Autalavou
Failautusi Pulega Vaimauga Sasa'e
Sui Matagaluega Apia Sasae i le Komiti Feau Eseese
Sui o le Komiti Iloilo Tusi Paia
13/10/2017 Atoa lona 70 tausaga, Penisione mai le galuega faafaifeau.
- 2/9/2020** **Maliu i lona maota i Vaitele-uta.**
11/9/2020 Sauniga Faaleaiga i lona maota
Taitai - Susuga Toeaina Ta'ei Ti'eti'e, AOG Fusi Fausaga - o le tane a lona tuafafine o Ta'iti
12/9/2020 Toe Sauniga, EFKS Faatoia
Taitai & Lauga-Dr. Paulo Koria FS
Faaulufale Maliu & Faitau Tusi Paia - Samata Iusitini
Leiloa FS. Tatalo - Oata Tuatagaloa FS.
Molimau - Uta Muaulu FS (Sui Vasega 1992), Iese Lotu Uele FS (Sui Fanau), Ta'iti Ti'eti'e & Atalani Saleapaga (tuafafine), Fesola'i A Sofara (Sui Aiga Tama), Eteuati Reupena FS & Tina Penisione Fofoga Tulifau (Sui Aiga Tina), Faletua ia Ane L.Uele, ma Dr Paulo Kolia FS.
Sauniga Oliolisaga Tumau (Vaitele) - Dr Paulo Koria FS.

(faa'uma itulau 13)

FAUFU SEILALA LUAMANUVAE

(19/4/1950 – 5/9/2020)

19/4/1950 Aso Fanau, Tama - Peseta
Faaumuumu Seumanutafa, Tina - Luisa Schwenke
Ilmaleota Peseta Seumanutafa.

Afioaga: Apia.

A'oga: Papauta Girls College, Kolisi o
Samoa, Kolisi Faafaia'oga, Malifa (TTC).

Galuega: Faia'oga o le Malo Samoa.

**28/4/1973 Faaipoipo ma Seilala
Luamanuvae FS o Foua, Salelologa.**

1973 - 1977 Galulue EFKS Fa'aala, Palauli.

1978 - 1995 Galulue EFKS Levi, Saleimoa,
Pulega Malua Sisifo, Mtg MALUA.

1995 Penisione ina ua 70 tausaga o le
susuga Seilala Luamanuvae FS. Malolo ma mapu
atu i le aiga i Fugalei, tautua o le Matafale maoti o le
EFKS Matafele fou (a o Matagaluega Apia Sisifo).

12/9/1995 Maliu Seilala Luamanuvae FS ae
fa'aauau pea le Matafale e Faufau ma le fanau mo le
isi 25 tausaga.

5/9/2020 Maliu @ 4.25am i lona maota.

15/9/2020 Toe Sauniga & Lagomau ai.

*“²⁷Auē! Ua maliliu toa, ua maumau ai auupega
o le taua!” 2 Samu. 2*

O le sã'i a le tupu o Tavita i le manumanu i auupega
ua maumau; auupega o loo iila, malolosi ma anagatã
o loo manaomia pea auã o loo tele lona tãua ma le
aogã. O le auupega sa faamoemoe ma faalagolago i
ai lenei Aulotu; sa faatuatua ina tele, sa fai ma siliaga
i le tele o nisi vaega taua o le galuega. Sa tu i
matagiolo, sa fai foi ma puluvaga i taimi sa lualuta ai
le folauga a le Ekalesia. Sa fai lana tofa sinasina
faatina penisione, o le toa manumanu ua mapu mai
le galuega a le Atua sa fitaituga ai, ma vailaau aogã
sa fofõ ai manu'anu'a o loto ma agaga a mamate, ae
maise o faatuatua ua tau pulapula, e ala i lana fautua
ma faalaeiau. O lona tulai mai i le Ekalesia, e ui o le
tina ua oti lana tane, a o se matafale malosi sa
faamoemoe i ai le Ekalesia. E malolo mai o aoaga
uma le fanau; sa toe alu Faufau saili lana galuega,
ona e lē mana'o e a'afia a'oga a le fanau, pe faaletonu
foi le faatinoga o ana mea faalelotu. E le'i alo tamala
Faufau i se taimi; o le faamaopoopoga o le mafutaga
a tina. O le faatinoga o ana teuga falesa, e aso atoa
o ia seia mama uma faamalalama ma le fola, ia
matagofie 'ie ma teu fugalaau e teuteuina ai ma
faamatagofie le malumalu mo tapuaiga i le Atua.

O se faletua e toafilemu lona soifuaga. E loto maualo
ma agamalū, e alofa i soo se tasi, e faamaoni i le
faatinoga o ona tiute mo lona aiga ma lana fanau, o
ona aiga ma aiga o lana tane. O se auaua e faamaoni
i lona Atua e ala i lana auaua i le Ekalesia. O se
tagata e savali i ana upu ma folafolaga. E leotele ana
galuega. E fiafia e faalaeiau ma faamalosi i ona uso a
tina i le mafutaga faapea le ekalesia. E fiafia i ona
tiute faa Faiaoga Aso Sa; e lagolago malosi i atinae
a tupulaga talavou, ma fiafia e auai ma faamaopoopo
le Aufaipese. O lo ma'ua lima taumatau i mea uma o
le galuega, sa fai ma siliaga i nisi mea o le galuega a
le Alii. O Faufau o le toa, e toa lona loto, e toa ana
upu ma toa ana faatinoga. E talitonu le manatu ua
alu fiafia le malaga a le Tina ina ua ia mautinoa ua i ai
se tasi o ona alo ua avea ma lupe faalele mo le Tala
Lelei, e sui tulaga ia te i la'ua mo le galuega a le Atua
ma fa'aauau le tofi faifeau na valaauina ai. O Seilala
Jr. Luamanuvae FS, (e lona 6th o le fanau e toa 7) o
loo galulue nei ma le faletua ia Agape Petaia Ualesi-
Seilala, o le feagaiga taulagi a le EFKS Vaivase-tai.
O le tausiga o fanau se tasi galuega tele sa nafa ma
le Tina ia Faufau; o se mitamitaga ia te ia le fesaga'i
ma fanau a lana fanau e tautusi, a'oa'o ma faatonu i
ala o le Alii. *“Ia e mata'u i le Alii lou Atua, e te
tausi i ana tulafono ma ana poloaiga...o oe, ma
lou atalii, ma le atalii o lou atalii i aso uma o lou
ologa.”* Teu.6:2.

O ona toe sauniga na faia i lana Ekalesia e pele i
lona loto, EFKS Ketesemane Fou i Fugalei i le Aso
Lua 15 Setema 2020 itula 11.00 i le taeao. O le
Pulega Faleata Sasa'e na feagai ma toe sauniga - na
taitai e le susuga Tavita Anesone FT, faitau Tusi Paia
Esekia Peneueta FS (Lepea), tatalo Amosa Reupena
FS (Vaimoso), lauga Kirisimasi Sani FS (Ululoloa
ma Siusega). O a'u na faaulufaleina lona sa ma faia
le molimau faaleagaga, ma le sauniga i lona oliolisaga
tumau i lona aiga lava i Fugalei o lagomau faatasi ai
ma lana pele o Seilala Lumanuvae. E ui i le vavao o
puipuiga o le faamai Koviti-19, ae na faatumulia ona
toe sauniga i ana uo, o ona aiganalua, ae maise le
paia o le aufaigaluega ma paaga Penisione, o faifeau
ma faletua, ma lana aulotu pele i Fugalei. E ui ina
faafuase'i ona e alu Faufau ae matou te lē fai loto,
auã ua valaau mai lou Matai, *“Ulufale mai ia oe lē
ua faamanuiaina e lou Matai, auã ua uma ona
teuteuina le fale mo oe.”* Tofa, tofa, tofaina oe,
tofa.

Saunia Susuga Misipalauni Faatau FT

NA O AFIGA E TULEI MAI FOFOGA O LE ALII

O LE MATAGOFIE O LE UFIFATAFATA

(i) *Esoto 39: "14Ua tutusa foi ia maa..ua sefulu ma le lua..pei o le togitogiga o le faamaufaaailoga..e tusa ma ituaiga e sefulu ma le lua."*

Pe afai e te vaai i le ufifatafata o laei e le ositaulaga sili o Isaraelu, ona e vaai lea o lou matagofie nauā i fofoga o le Atua, i le avea ai o oe ma ona atalii/afafine ua faaolaina. Ua tuuina mai e le Tusi Paia faamatalaga auiliili i laei o le ositaulaga sili, ma e leai se faamatalaga auiliili i le Tusi Paia e aunoa ma sona uiga loloto. A o tatou matauina le ufifatafata tatou te vaai ai se mea e sili ona matagofie faasino i le auala o loo silasila mai ai le Alii ia te i tatou. E sefulu ma le lua maa tāua sa i ai, e tofu le maa ma le igoa o le ituaiga e tasi mai le sefulu ma le lua. Ma e talu ai ona o Iesu lo tatou Ositaulaga Sili, e lelei foi ae tatou vaavaai i lenei ufifatafata pe se a se a'oa'oga mo i tatou. O nei maa o maa tāua. E lei faaaogāina e le Atua maa masani e maua solo ma taatele i lafanua o Isaraelu; na la filifili lelei i ituaiga maa tāua anagatā ma taugatā, e pei o *'salikea, topasi, pereketa, nofeka, safaira, ialoma(taimane), lesema, sevo, aselama, tasesa, soama, iasepi.'* (Esoto 39:10-13). O maa tāua nei e faamatala ai i tatou taitoatasi o le upu o loo faaaogā o le 'matagofie/tāua' (precious). O la le Tusi Paia, e 'matagofie/taua' oe i le silasila a le Atua (Isaia 43:4). O loo fai mai foi le Tusi Paia na faatauina oe i le toto 'taua/matagofie' o Iesu (1 Peteru 1:19). E faapefea ona e faavasega le tau o se oloa? E fua i le tau ua nofo sauni se tagata e totogi ina ia faatau atu ai. O se molimau moni lenei e ao ona manatua pe afai e te toilalo ma ua tausala ona e e Satani ona o agasala ma vaivaiga. A o silafia lelei e le Atua au agasala uma - o agasala ua tuana'i, o agasala o faia nei, ma agasala o le a faataunuu i le lumana'i- na Ia auina mai lava Lona Atalii pele e toatasi ina ia toe faatauina atu oe, e ala i le faamaligiina o lona toto tāua ma le matagofie. O taimi uma e te talitonu ai i le Keriso, o lou matagofie i fofoga o le Atua e lē faaitiitia. Aiseā e faapea ai ona finagalo le Atua o oe e matagofie? Auā o taimi uma lava, e silasila mai fofoga o le Atua ma na la silafia oe e ala ia Iesu Keriso Lona Alo pele.

(ii) *Eperu 4: "14Ua ia i tatou le ositaulaga silisili...o Iesu le Alo o le Atua."*

E 2 nisi itu loloto ma tāua faasino i le ufifatafata e ofuina e le ositaulaga sili a Isaraelu:

(a) *E latalata i lona fatu.* E faa-tasi i le tausaga i le Aso o le Togiola ona ulu atu le ositaulaga sili i le 'Mea e Sili ona Paia', o i ai le afioaga o le Atua, ina ia maua mai ai le faamagaloga o agasala a tagata. Sa ia ofuina laei eseese, e tofu ma lona uiga loloto e tofu ma le moni o lona tāua. Ae mai nei ofu eseese na ia laei ai, o le ufifatafata e aupito latalata i lona fatu. E ta'u mai ai i lenei mea le alofa silisili ese o le Atua ia te oe ma Lona faatāuina o oe, ma o Lona finagalo ia latalata mai o Ia ia te oe. O loo fetalai mai o Ia ia te oe i lenei aso, *"Ou te lē tuua lava oe, ou te lē tuulafoai lava ia te oe."* Eperu 13. Maeu le matagofie o lenei folafolaga!

(e) *O igoa o ituaiga taitasi e le'i na ona tusia i luga o le ufifatafata, ae sa vaneina ai i ona luga.* Soo se mea e tusia, e mafai ona toe soloiesea pe faafuase'i ona toe te'a ese, ae lē faapena pe afai e 'vaneina'. E lua auala e mafai ai ona e agasala. Muamua pe afai e te filifili e fai ma le loto i ai, ma lona lua ina ua tautevateva ma toilalo e ala i le vaivai. Ma e aoaiina ma faasa'o oe e le Atua ina ia e toe sagatonu ma savali i le ala sa'o, ae na te lē mafai ona liliu mai Lona tua ia te oe, e tuulafoaiina pe lafoa'i ia te oe. E leai, e sili ona tāua ma matagofie oe ia te Ia. E manatua e Ia le tau na Ia totogi e faatauina ai oe ma o loo Ia fetalai mai, *"Ou te lē soloiesea foi (lou) igoa i le tusi o le ola"* (Faia 3). Pe afai e tumau lou faatuatua ia Iesu Keriso, ona e mautinoa lea o le alofa o le Atua mo oe ma Lona taliaina o oe.

(iii) *"O lenei, ua ia te outou o e faatuatua o lenei mamalu"* 1Peteru2

Ua tatou iloa nei mai le vaai atu i le ufifatafata o le ositaulaga sili a Isaraelu:

(a) E matagofie ma tāua tele i tatou i le Atua;

(e) E latalata i tatou i Lona fatu;

(i) Na te lē liliu mai Lona tua ia i tatou.

Pe afai e te faapea ane, Afai e lē mafai e le Atua ona liliu mai Lona tua ia i tatou, o lona uiga e mafai ona pule le tagata i le ituaiga soifuaga e ala ai? E leai, ma o le mafuaaga lenei. O le avea ai o i tatou ma atalii/afafine o le Atua, e le gata ua matagofie i tatou i ona fofoga, ae ua matagofie foi o Ia i o tatou mata. O lona uiga o le a tatou faatāuina lo tatou sootaga ma Ia e sili atu i lo se isi mea, ma leoleoina mai i fili e lamatia ai. Fesili: Pe afai e te silafia lou tāua, lou matagofie ma lou taugatā i fofoga o le Atua, e avea

lena ma ala e te fia alu atu ai e fai le agasala pe fa'aauau ai pea le ola agasala? E leai! O le tuufaafegai, e tatau ona faapea ifo ou manatu ma lagona, 'E lē faapenei le amio a se tagata faatuatua o loo matagofie i fofoga o le Alii.' O le taimane tautele e lē fai mo ia le lopala, manogi leaga ma le inosia o le agasala. O lona nofoaga tonu o le latalata i le fatu o le Atua e pupula ma susulu feilafi ai. O lou iloa lelei o lou tulaga moni, lou faasinomaga tonu ma le fesootaiga sa'o ia Keriso, e siitia ai oe i luga atu o le manao e fai le agasala. Na te faaosofia oe i le mana'o e savali ma ola o se atalii o le Tupu. O le upu moni, o le ola i se olaga faapaiaina o le iuga lea o lou vaaia o oe lava e pei ona silafia oe e le Atua e ala ia Keriso. E te lē pa'ū atu i faaososoga, ae e te fesili ifo, Po o le a se mea e fai e Iesu i lenei tulaga ua oo mai? Ona e maua mai lea o le malosi mai ia te Ia ma Lona mana, ma e faia ai le gaioiga sa'o. O le malamalama moni i le alofa tunoa o le Atua na te lē aveesea le ola faapaiaina, ae na te faatupuina.

A'OA'OINA MAI IA TAVITA

(i) *"²⁸Ua tatou iloa foi e galue le Atua i mea uma lava mo le lelei faatasi ma i latou o e ua alolofa atu ia te ia, o e ua valaauina i lona finagalo."* Roma 8.

Na fetalai le Atua, *"²²Ua ou maua Tavita le atalii o Iese, o le tagata e tusa ma lo'u nei loto, na te faia o mea uma lava ou te manao i ai."* Galu 13. Pe afai e fetalai faapea le Atua faasino i se tagata, o se mea atamai tele le maitau lelei o le olaga o lona tagata. O Tavita na amata mai o se leoleo mamoe ae faai'u i le avea ma tupu. E leai se avanoa e tatau ona tupu ai se mea faapea. O leoleo mamoe o tagata e sili ona maulalo ma faatauva'a i totonu o sosaiete ma faalapotopotoga o agafesootai; e lē mafai ona faatautō i latou pe tautala i totonu o se faamasinoga ona e leai se tasi e faatuatuaina la latou upu. Peitai o Tavita e uma ane na ia tusia nisi o Salamo aupito lauiloa o le Tusi Paia.

Ia manino lelei le mea lenei: pe afai e te valaaulia le Atua i totonu o lou olaga, e faalēaogāina e Ia faalētonu uma o lou olaga ua tuana'i, ma toe tusi atoa le faafanua o lou lumana'i. Ae tatau ona e filifilia mea ua filifili e le Atua mo oe! E i ai le eseese ga mālie i le va o Paulo ma Tavita. O Paulo na ia ola i

se olaga lē usiusitai ae na te le'i maua Keriso, ona faato'a faasaga ane lea e ola i se soifuaga faatuatua Kerisiano e fai ma faataitaiga e sili ona lelei. O Tavita na avea ma tupu ina ua tolusefulu ona tausaga, ma o le 40 tausaga o lana nofoaiga na soifua ai i faigata o le toilalo aofia ai le mulilua, faitaaga ma le fasioti tagata. E i ai ni lesona taua iinei:

(a) *Aua e te faanatinati e faamasino atu.* E leai se mea e uma se'i vaganā ua fetalai le Atua e faauma. O le talaaga o le olaga o Tavita e fai ma lapataiga i le tagata solitulafono, o se a'oa'iga mo le tagata faafiaamiotonu, o se faamaoniga o le faamasinoga tonu a le Atua na te lē tuufauina oe e sola ese mai tuatuagia o au amioga, ma se molimau i Lona alofa e lē mafai ona Ia tuulafoai ia te oe. (e) *E mafai e le Atua ona aumaia se lelei mai totonu o se tulaga leaga.* E mafai e Ia ona ave mea leaga uma na e ui mai ai, ma liliu e tupu mai ai se mea e sili ona lelei – e lelei mo oe pe lelei mo isi tagata. O le aano o le mataupu, e mafai e le Atua ona 'galue i mea uma lava mo le lelei'.

(ii) *"¹²Ia faaa'oa'o i e ua maua i le faatuatua ma le onosai mea na folafolaina."* Eperu 6.

O nisi a'oa'oga mai le olaga o Tavita:

(a) *O le Atua e faia le filifiliga.* Ina ua alu ane le perofeta o Samuelu i le aiga o Tavita e filifili le isi tupu o Isaraelu, e le'i amanaiaina Tavita. Peitai na filifilia lava o ia e le Atua – e pei lava ona sa Ia filifilia le tamaitai o Tepora e taitai le malo e fulisia le malosiaga i le itupā o tane. Soia e te tau mateina le Atua! Ma soia le faatusatusaina oe i isi! Tatou te ono teena le toatele o tagata na tofia, filifilia ma faaagā e le Atua, ma faaalua ai le papa'u ma le itiiti o lo tatou iloa.

(e) *O le Atua e tusia le ata.* *"⁶Ua ou mautinoa lenei lava mea, o ia na amataina le galuega lelei i totonu ia te outou, e faaatoatoaina ai lava e ia."* Filipi 1. O ai na te mamanuina le faafanua? O ai na te faatinoa? O ai e tatau ona tuu atoa i ai lou talitonuga? O le Atua! O lana fuafuaga mo Tavita e aofia ai le tele o tausaga o fe'alofa'i solo mai le tao ma le pelu a Saulo, o le lafilafi solo i ana o se pagota sulufa'i, ma auau faatasi ma tagata faatauva'a e ono selau na latou toe faaliliuina le uiga o le upu 'lē atoatoa' ina ua faaliliuina oe e le Atua e ala i faigata e te ui mai ai ina ia e gafatia le tofi ma tiute o finagalo i ai mo oe.

(i) *O le Atua na te faia le faasologa.* *"¹²Ia faaa'oa'o i e ua maua i le faatuatua ma le onosai mea na folafolaina."* Eperu 6. O le 'onosai' o lona

A'OA'OINA MAI IA TAVITA

uiga o le tutumau ai a o u'una'i malosi mai le tele o mea mamafa. O le tau e fai mo le tagata e matuā tinoū lona naunautaiga a o faalevaleva taufālōga. Na faau'u Tavita e avea ma tupu a o tama talavou, peitai faato'a nofoi i lona nofoalii i le 30 ona tausaga o lona matua. O lea ia e onosai. O loo faia e le Atua le galuega o le sauniuniga i lou olaga seia oo ina saunia lelei oe pe a oo mai lou taimi. Ioe, e faigata le faatali. Ae afai e te oso muamua ae le'i pa le fana, o le a faalēaogāina oe mai le tu'uga. Tau ina sauni, faatali, taula'i le vaai i le tini ma le faailoga ma 'aue le fiu pe musu gofie.

(iii) *"¹⁷Ua faalogo...ona o a'e lea o Filisitia uma e saili ia Tavita."* 2 Samu.5.

Ua tusi mai le aposetolo o Paulo, *"¹²Ia e tau le taua lelei i la le faatuatua"* 1 Timo6. O le tele o nisi folafolaga a le Atua, e manaomia lo tatou tau ina ia saili ma maua mai ai. Na ulua'i nofoia ma pulea Ierusalem e sālēpusē na latou faapea ane, *"^{6e}E lē masao mai Tavita iinei!"* 2 Samu5. Ia e nofo sauni ma le mautinoa e i ai 'au faasagatau mai i ou faamoemoega ma lau visiona, ae maise pe afai e leai ni faamaoniga ua aliali tino mai e iloa ai lou agavaa. Sa sili ona faigatā mo Tavita ona a'ea Ierusalem, ona o le maua luga o lona tulaga e lē gafatia e lana itu'au; na o le pau le ala e mafai ai o le ui atu lea i le alāvai, e āsa atu i lōpala ma otaota lafoa'i inosia. *"⁷(Ui lava i lea) A ua aea e Tavita le olo o Siona."* 2 Samu5. Ia malamalama lelei i le itu lenei: Pe afai e finagalo le Atua e talafeagai, na te faia ia faau'i a'e oe mai le lopala ina ia e aulia lou nofoalii. Maitau le upu **(ui lava i lea)**. Pe afai ua oo mai i luga o lou ulu le faaputuga o faafitauli ma le fili ua fai mai e te lē masao mai iinei, tau ina e tutumau i Afioaga a le Atua ma tali atu i ai, *"**Ui i lea..**"* Ia e tula'i atu i le faatuatua ma fai mo oe mea ua uma ona folafolaina mai e le Atua. *"^{32e}O le nuu o e ua iloa lo latou Atua latou te faamalolosi ma fai mea tetele."* Tanielu 11.

E mafai e le Atua ona faasino atu ia te oe pe faapefea ona e sao mai soo se faafitauli ina ia e manuia ma saogalemu ma viia ai Lona suafa. Peitai 'aue e te faamoemoe o le a fesoasoani atu tagata uma. *"Ua faalogo Filisitia ua faauuina Tavita e fai ma tupu ia Isaraelu, ona o a'e lea o Filisitia uma e saili ia Tavita."*

E mana'omia lou tau – tauivi, taumafai, tausiniō, ina ia e oo i lou taunuuga, ma ia tau pea ina ia taofi mau ai. Ma e ao ona fesili pea lava pea i le Atua mo faatonuga o taua taitasi. *"¹⁹Ona fesili atu lea o Tavita i le Alii, ua faapea atu, Ou te alu ea ia Filisitia? E te tuuina mai ea i latou i lo'u lima? Ona fetalai mai lea o le Alii ia Tavita, Alu a'e ia, auā ou te tuuina atu lava o Filisitia i lou lima."* 2 Samu5. Lenei aso ia faaa'oa'o ia Tavita.

(iv) *"¹⁶Ona sofaia lea e nei toa e toatolu i le togālauapi."* 2 Samu23.

Na iloa e Tavita ona atia'e isi taitai. Na te le'i 'faaogāina' isi tagata ina ia maua mai ai mea na ia manao i ai. Peitai sa ia silafia lelei a latou taleni, ona tuu lea i ai o avanoa e auauna ma tautua ai, ona ia tauia lea ma faamamaluina i latou. O le i'uga na faaosofia nei tagata e ofo atu o latou ola mo Tavita. Ua tatou faitau i le 2 Samuelu 23, *"¹⁵Ona manao ai lea o Tavita, ua faapea, Ta fia inu vai o le vaieli i Peteleema o loo i le faitotoa!"* *¹⁶Ona sofaia lea e nei toa e toatolu i le togālauapi a Filisitia, ma latou utu vai...ma aumai ia Tavita."* E faigata ona aoaoina e avea ma taitai pe afai e lē faatinoina le taitaiga. O le upu moni o le taitaiga o le faatinoga. O le avea o i tatou ma taitai, e masani ona mafuli la tatou taitaiga i le tuuina atu i isi tagata o feau latou te faatino nai lo tiute faa-taitai latou te faataunuu. Ae afai tatou te lē tofia faamatuu atu le taitaiga – faatasi ma le pule ma pulega lelei – o le a lē maua e o tatou tagata le poto masani e manaomia latou te taitai lelei ai.

Pe afai o oe o se taitai, sei tali mai le fesili lenei ma lou faamaoni: o e tuuina atu i ou tagata le poto masani i taitaiga? 'E faapefea pe a latou toilalo?' e te ono fesili ai. E mautinoa latou te toilalo! Peitai afai e te filifili tagata e i ai agavaa faataitai lelei, o le a latou aoaoina mai ai i le toilalo. O loo tusia e le alii fomaini tusitala, failauga ma faifeau o John Maxwell faapea, *'A o faasolo ina ou matua, ua ou manatu ia te a'u o se sii-ufiufi (lid lifter). O la'u galuega autū lena i le avea ma taitai o se vaega. Pe a mafai ona ou siitia le ufiufi faa-taitai mo sui o la'u vaega, lona uiga ua faataunuu ou tiute. O le tele o pa pupuni ou te sii ese mo o'u tagata, o le tele foi lea o le avanoa e tulai mai ai i latou i o latou gafatiaga'.* Na ati a'e e Tavita ni taitai sa mulimuli ane ta'ua o 'toa', ma e tatau foi ona tuu atu lou faatuatuga i nisi ia avea ma siamupini.

A’OA’OINA MAI AI TAVITA

(v) “¹*O toe upu nei a Tavita.*” 2 Samu 23.

E i ai se aso o le a maliliu ai toa, o le a talai ofu tau ina ua manava feau, ma o a tatou toe upu o le a avea ma upu e sili ona tāua. O le fesili e faapea, ua e soifua i le mea e sili ona maua luga e gata mai ai lou mafai ma faataunuu le faamoemoe o le Atua i lou olaga? Fai mai le Tusi Paia, ‘*O toe upu nei a Tavita*’ Se a se upu a ia ta’u maia ia i tatou? O le tala o lona olaga e pulepule i le lelei ma le leaga, o faasiliga ma māumāu, o manumalo ma toilalo. I taimi o lona soifua na toso faamalosi ai e lona lava atalii lona afafine, na fasioti e le tasi atalii le isi atalii, na lafoa’iina e lana avā, o ana uo na latou faalata ma fao lona malo, o lana faufautua na taumafai e fasioti o ia, na teena e lona aiga, e tele taimi o lafilafi solo i le vao ma ana. O lea o le a saunoa mai o ia ia i tatou mo le taimi mulimuli. Mata o le a talanoa mai ia Koliata? Saulo? Patisepa? E leai.

“¹*Na fai ane Tavita..le tagata ua faaeaina..o le ua faauuina e le Atua o Iakopo..o le faipese malie o Isaraelu,* ²*O a’u na fetalai ane ai le Agaga o le Alii; o lana afioga foi sa i lo’u laulaufaiva.* ³*Na fetalai mai ia te au le Atua o Isaraelu; o le papa o Isaraelu, ua fetalai mai o Ia, O le ua pule i tagata ia faia ma le tonu; ia pule ma le mata’u i le Atua;* ⁴*e pei o le malamalama o le taeao ina ua alu a’e le Ia, o le taeao e leai ni ao uli; e pei o le vao mu’a mai le eleele i le pupula mai mai le timuga.* ⁵*E ui lava ina le faapea lo’u aiga ma le Atua, ua na osi se feagaiga e faavavau ma a’u, o loo saunia i mea uma lava, ma ua tausia; auā e ui lava ona le faauluoloina e ia, ona gata lea o lo’u olataga, ona gata foi lea o lo’u mana’o.*” 2 Samu 23.

(vi) “¹²*A fa’aatoaina ou aso, ma e taoto faatasi ma ou tamā, ona ou faatūina ai lea o so lau fanau pe a mavae atu oe, e tupu mai ai ia te oe, ou te faatumauiina foi lona malo.*” 2 Samu. 7

E sefulumalefitu fuaiupu i le Feagaiga Fou o loo tusia ai Iesu o le ‘Alo o Tavita’ e ui ina tusa ma le afe tausaga e va ai le maliu o Tavita ma le fanau mai o Iesu. Se a lona uiga o lenei suafa ‘Alo o Tavita’ ua faalupe ai Iesu? O lona uiga o Iesu le Keriso, le taunuuga o le perofetaga na valoia e Natano, a o le

fetalaiga tuu sa’o mai le Atua o loo faamauiina i le 2 Samu 7:12-16. O loo molimau le gafa o tusia e Mataio 1, i le tupuga mai o Iesu ia Aperaaamo ma Tavita e ala ia Iosefa le tamā faalelalolagi o Iesu. O le gafa a Luka 3 o loo molimau i le tupuga o Iesu e ala ia Maria lona tina. O Iesu e tupuga mai ia Tavita, i le auala o le gafa vaetamaina e ala ia Iosefa, a o le auala o le gafa toto e ala ia Maria. “³*O le Tala Lelei e uiga i Lona Alo o Iesu Keriso lo tatou Alii, o Le na fanau mai i le aiga o Tavita i la le tino.*” Roma 1. O le suafa faa-Mesia. Pe a valaau tagata ia Iesu i lona suafa lenei, latou te talitonu o le Mesia lenei o Iutaia (male lalolagi) ua leva ona faatali i ai, o le taunuuga o valoaga i le Feagaiga Tuai. O i latou na valaau ma le faatuatua, ‘*Le Alii e, le Alo o Tavita*’, o e na saili mo se faaolataga poo se faamalologa; pei o le fafine o Kanana sa ulufia lana tama teine e le temoni (Mataio 15:22), ma tauaso e toalua (Mataio 20:30). O le suafa ‘*Alii*’ e ta’u atu ai lo latou talitonu i lona tulaga Atua, lona mana ma lana pule, a o le suafa ‘*Alo o Tavita*’ e faailoa ai lo latou talitonu o Ia le Mesia poo le Keriso. Na iloa lelei e Ositaulaga, Faresaio ma Tusiupu le uiga o le valaau a tagata ia Iesu o le ‘Alo o Tavita’.

Peitai na faatauaso i latou e lo latou faamaualuga, fiasili ma faafiaamionu, na latou lē iloa ai mea na vaaia e tagata tauaso – o le Mesia lenei ua leva ona latou faatali i ai. Na latou itagia o Ia ma tiga latou loto i le valaau a tagata, “¹⁵*Osana i le Alo o Tavita*” (Mata 21), ma latou taupulepule ai e fasioti ia te Ia (Luka 19:47).

“¹*Ua tulei mai le afioga a le Alii i lo’u Alii, Ia e nofo i lo’u itu taumatau, seia ou faia e ua ita ia te oe ma mea e tu ai ou vae.*” Salamo 110. Na lu’i e Iesu i latou nei ina ia latou faamatala atu le uiga o le faalupega lenei: E faapefea ona ta’u le Mesia o le Alo o Tavita, a o Tavita lava ia na ta’ua o ia o lona Alii? (Mare. 12:35-37) Sa le’i mafai ona latou tali le fesili, ma faailoa atu ai e Iesu lo latou vaivai ma le valea i aoaoga a le Feagaiga Tuai faasino i le Mesia, ma atili ai ona latou fia tagolima ia Iesu. O le aano moni o le fesili a Iesu e a’oa’o mai ai o le Mesia e sili atu o Ia nai lo se atalii faalelalolagi e tupuga mai ia Tavita. Afai o le Mesia o le Alii o Tavita, o lona uiga e silisili atu o Ia nai lo le tupu o Tavita. Ua fetalai Iesu, “¹⁶*O a’u o le A’a ma le fanau a Tavita.*” Fa’aa. 22. O Iesu e lē gata o Ia na foafoaina Tavita, a o Ia foi o le suli o Tavita. Na o le Alo o le Atua liu tagata e mafai ona ia faia lea upu.

O MEA'AI TATAU MA LE ASO (OUR DAILY BREAD)

(O Mafaufauga Faaleagaga o aso taitasi, ua faaliliuina mai le Tusi Faitau Aso)

Vaiaso 27 Setema - 3 Oketopa 2020

TALALELEIA MATAIO,
MALOLOGA MA IESU

Aso Sa 27 Setema 2020

O le valaaulia. Tusi Faitau – Mataio 11:25-30

“²⁸Ia outou o mai ia te a'u, o outou uma o e tigaina ma mafatia i avega, o a'u foi e malolo ai outou...³⁰Auā e avegofie la'u amo, o la'u avega foi e māmā ia.”

‘Fai sina mapu teisi’ – o le faaupuga masani lenei e faamanatu mai ia i tatou e lelei le fai o se malologa – ma e tele auala mo i tatou e faia ai lenei mea. O le faitau tusi, fai sina savaliga, vali ni ata, pe fai sina faasausauga ma uo, o nisi faata'ita'iga mai le tele o auala. O mea nei latou te aumaia taimi paganoa mai le mamafa o tiute o le soifuaga tatou te tauave; o taimi e faafouina ai le tino, le mafaufau ma le agaga. E lelei tele le faamanatu mai e fai sina koma ma sina malologa. ‘O mai ia te a'u’ – Ua valaaulia foi i tatou e Iesu e malolo. Peitai o lenei malologa e lē faasino i se taimi faaletino i fafo (time out), ae mafuli i se taimi faaleagaga i totonu (time in) - o se valaaulia ina ia tatou faia se sootaga ma Ia, o le a tatou maua ai le malologa mautū e sili atu nai lo se koma ma se tausiga i se taimi puupuu. O le malologa tumau lenei, ua avea o se avega faale-mafutaga faauo ma le Atua, o se mafutaga na te aumaia le mapuea mai le tauamoina na o avega o le olaga. I faitauga o lenei vaiaso, o le a tatou fetaia'i ai ma Iesu o loo lotolotoi i le ogatotonugalemu o le soifuaga o tagata, ae mafai pea e Ia ona faafofoga atu ma aapa atu i fafo. Tatou te fetaui ia te Ia o loo Ia faia le faata'ita'iga o le soifua e mafuta ma le Atua; pe faapefea ona avea le ofuina o lena ‘amo’ faalelagi e faatumaui ai i tatou a o tatou feagai ma mea uma e tuuina mai e le lalolagi ia i tatou.

† Le Atua e, o le puna o le filemu uma, ia aumaia ia te au le alofa e tali atu ai ‘Ioe’ i lau valaaulia ina ia ou malolo i lau Afio. Amene.

Aso Gafua 28 Setema 2020

Leai se taimi pei o le asō. Mata 12: 1–14

“⁷Ou te loto i le alofa, a e lē o le taulaga.”

O le olaga i Niu Sila i le vaitau o le 1950, e masani ona faalogoina le au matutua o faapea, ‘e leai se taimi e tusa ma le taimi nei’ – ‘aua le faia mulimuli ane, ia faia nei – ma ia faia loa! Mata e faapea le fetalaiga a Iesu i le au faitio na latou fesiligia o Ia i le faataga o le fafaga o ona soo i le sapati, ma lona lē faatali e fai faamalologa i le sapati. O tulafono i ona vaitaimi na latou faasāina mataupu faapenei - o tulafono na mafua ai e Iesu, i lona faamuamua o aiā tatau autū o tagata, na Ia tuuina atu ai se fesili faaleagafesoota'i e sili atu lona lautele: o ai e tautuaina e le tulafono? O ai e faamanuiaina ai i le tasi itu, a o ai e lē aofia ai i ona faamanuiaga ona o ia tulafono i le isi itu? O se finauga fa'aauau pea lenei mo i tatou foi. E tele faata'ita'iga i totonu o sosaiete ma faalapopotoga o le au faatuatua tatou te maua ai le feteenaiga lenei; o le tali atu i le alofa e feteena'i ma tu ma aga masani ua faatulafonoina i faalapopotoga o tagata.

I le avea ai o se misionare i se itumalo matitiva i le amataga o le vaitau 2000, sa u'una'i malosi a'u e ofisa o agafesootai ina ia ‘aua le tuuina atu mea taumafa i aiga i taimi e manana’o mai ai, ma tulai mai ai le feteenaiga tele i le va o le tausisi ia fafaga le fanau i nei aiga pe a fia aai, ma tulafono o loo faatonutonu ai pe faafia ona avatu fesoasoani. E lē alofia e Iesu le finauga; o lona faatinoina o galuega alofa na Ia fa'aali atu mea e lē mafai ona faailoa e fefinauaiga: o le fia'ai ma le fia togafitia e lē mafai ona tuu atu i se isi taimi mulimuli ane. E faapea foi, o le galue ina ia mautinoa le i ai o se soifuaga amiotonu i le sosaiete mo se taimi umi, e lē mafai ona tolopō pe faapafala. E lē mafai ona faaositaulaga le tasi mo le isi. O nei mea e lua o galuega uma o le alofa, ma e la te manaomia lo tatou amanaiaina, mo i la'ua ‘e leai se taimi e tusa ma le taimi nei.’

† Le Atua e, o le alofa mutimutivale, aumai ia te au le alofa matou te tutū ai ma i latou o loo tele so latou manaoga, ma le lototele e finau ai ma fautua ina ia tula'i mai suiga lelei. Amene.

† Mo mafaufauga atili: O a ni mataupu faaleagafesootai o loo aafia ai oe i lenei taimi, o a ni mataupu ogaoga ua lamatia ona o feteenaiga? O i ai ni taiala mai le faitauga o lenei aso e mafai ona fa'aaogā i ai?

Tāua o Faailoga

Mataio 12: 38 – 50

“³⁸Ona tali mai ai lea o isi o le au tusiupu ma le au faresaio, ‘Le a’oa’o e, ua matou fia iloa se faailoga ia te oe.”

O faailoga o mea tatou te manaomia uma lava. Latou te faasino i tatou i le itu sa’o, e fesoasoani mai pe a tatou fesēa’i i nofoaga tatou te lē masani ai, latou te faamalosia i tatou e o atu pea, latou te faamaonia mai o le a tatou lē leiloloa. Na fesili tagata ia Iesu mo se faailoga. Sa latou fia tofotofo ia te Ia pe o loo aga’i tonu ana a’oa’oga i le itu sa’o. Na te’ena e Iesu. Na Ia ta’u atu o Ia le faailoga o loo latou manaomia, ma valaauina ai latou e fai la latou filifiliga faavae i mea ua latou vaai ma faalogo i ai. Na Ia faasino i latou ia Iona (o se faailoga musuā pe afai e i ai se mea faapea!), o lana lauga atu i tagata Nineva na mafua ai le suia o le itu latou te faasaga i ai ma liliu o latou ala i le Atua. E molimau le tala faasolopito o le lalolagi i le toatele o i latou sa avea ma faailoga mo le lalolagi: o perofeta na latou faia suiga tetele i le itu e faasaga i ai e ala ia latou a’oa’oga ma faataitaiga loto tele. O Matini Luteru Kini (USA), Gandhi (Initia), Te Whiti O Rongomau (Niu Sila), ma Nelesoni Mandela (Aferika i Saute), o sui o i latou uma sa tete’e i le faia’e ma faiifo o mafauauga, ma faasino i tatou i le itulagi o le filemu, faaleleiga ma le amiotonu mo se lalolagi e sili atu ona lelei. O le avea o i latou ma faailoga moni sa faaalua i le siitia a’e i tulaga lelei na mafua mai ia latou taitaiga. O le luitau lea o loo tuuina atu e Iesu i lana au faalogologo. O le moni o ana a’oa’oga o loo fai foi ma lu’itau mo tatou: ina ia avea ma faailoga o le faamoemoe i o tatou taimi i o tatou nuu. E lē tau faia i tatou ma ni ta’ita’i iloga o le lalolagi, ae tau lava ina avea ma tagata o le Atua e ola e tusa ma lo tatou talitonuga, ma faasino atu ai e i ai le isi auala.

† *Le Atua e, fesoasoani mai ia avea a’u ma faailoga o lou agalelei, e ala i lo’u avea ma tagata e tusa ona sa e faia ai a’u: i le aiga, i le galuega, ma tafatafa o a’u uo i totonu o lo’u nuu. Amene.*

† Mo mafauauga atili: O le a le uiga o le avea ma faailoga ia te oe? Faasoa ou mafauauga i sau uo; o a ni lu’itau, o a ni mea faatupu fiafia?

Lūlūga o le Vaitau

Mataio 13:1-9, 18-23

“²³A o le mea sa luluina i le eleele lelei, o ia lea ua faalogo i le upu, ma lagona ai; ua fua mai lava ia, e taiselau i nisi, e taionogafulu i nisi, e taitolugafulu foi i nisi.”

I le tausaga 1888 na valiina ai e Vincent van Gogh le ata o le faata’oto lenei, o fa’aalia ai le ata o se lulusaito foliga senituri sefulumaleiva o galue i lana faatoaga. Pe ana valiina i le tausaga nei 2020 atonu e matuā ese le vaaiga, pe i ai ata o meafaigaluega eletise ma masini faaonaponei, poo se faifaatoaga o umia se iPad i lona lima! Poo le a lava le auala tatou te vaaia ai, e tumau pea le moni o le malamalamaga o le faataoto faasino i le eleele na te talia mai le fatu: o le eleele o tatou olaga e tataua ona tapena ina ia talisapaia, mo le seleselega a le Atua ia ola ai i totonu o i tatou. Peitai o lenei talisapaia e lē mafai ona soona taumateina; i vaitau eseese o tatou olaga, o le nofo saunia e talia, e salasala tusa ma tulaga na tatou oo i ai ma lu’itau na tatou fesaga’i. O nai tausaga talu ai a o avea a’u ma ta’ita’i lagolago i le iunivesete, sa masani ona ou faalogo i faaseā mai tamaiti a’oga o e na faafailele ma tutupu a’e i le faatuatuaga, ae o loo tauivi ina ia tumau ai pea i totonu o le si’osi’omaga o le iunivesete; sa latou fagatua ma lu’itau o ulua’i a’oa’oga o le amio ola ofoina atu, sa tauivi ai e saili se tapasā faaleagaga e maumaututū i felafolafoaiga ma finauga faa-filosofia ma faa-mataupu silisili. Na latou maua ai o le eleele tatou te amata ai, e tataua ona galueaina i laasaga eseese o lo tatou olaga. Mo le toatele, o faiga ma auala faaleagaga ua lauiloa e pei o le tatalo i aso uma poo le fautuaina e se paaga faaleagaga, ua mautinoa o nisi ia auala lelei o le faaleleia o lenei eleele. Ao o’u mafauafau i lenei faataoto i lenei taimi o tusia ai, ou te faafetai o le luluuga o se mea faa-vaitau; poo le a lava le vaitau, e foliga mai o le lūlū saito e lē mafai ona misia lona i ai, e lūlū le tala lelei o le alofa lē faatuaioa o le Atua, e fausia ai avanoa fou mo le ola ma le tupu a’e.

† *Le Atua e le Mataisau, ia faatumau lo’u faafetai pea ona o lou faamaoni i vaitau uma o lo’u olaga, ma ia faia a’u e faaauau ona ou tupu ma ola ma fua mai i lou lalolagi. Amene.*

† Mafauafau atili: Toe mafauafau i vaitau ua te’a o lou olaga, i taimi sa e mataala ai i le Atua, ae poo le a sona uiga i lau malaga fa’aauau faalefaatuatua.

Tatau ona fai se fuafuaga Mata.13:24-30,36-43

“^{28e}Ona fai mai ai lea o auuuna ia te ia, E te finagalo ea matou te o atu e veleeseina nei mea?

²⁹A ua fai atu ia, ‘Aua; ina ne’i outou lia’i ma le saito pe a outou vele ese le titania. ³⁰Tuu ia, ia tupu lua pea seia oo i le seleselega; a oo atu i ona po e selesele ai, ou te fai atu ai i e selesele..”

O vao e faapea le tala, o fugalaau ia latou te le’i ausia le lisi o laau e taliaina. Peitai e i ai laau taliaina, a oo ina toe fesiita’i ese mai o latou nofoaga faalenatura, ona avea lea ma vao mata’utia i o latou siosiomaga fou. I le faataoto o lenei aso, e i ai se tasi e foliga mai na fai lana galuega o le toe fesiita’i o laau; tatou te vaaia faalemafaufau le lē to’afilemu o le au galulue! E tatau ona fai se fuafuaga! I Niu Sila sa tula’i mai ai se lē toafilemu faapenei faasaga i tagata kolone mo le mafuaaga faapea. O laau na auina mai le itu i mātū sa lamatia ai le saogalemu o a matou lava laau o le flora ma le fauna. E tatau ona fai se fuafuaga. Ua a’oa’oina i matou e manaomia le faaeteete tele e aveese le flora ua fesiita’i aunoa ma le faaleagaina o isi laau ua latou ola faatasi. O le galuega a tagata mo le faasaoina o laau totō ua latou faia se faataitaiga o le tausiga ma puipuiga lelei, e pei o le siakiina i malae vaalele, e auga uma i le taofia o ni fili lē manaomia e oo mai i o matou lafanua.

E manaomia le faaeteete tele pe afai e faafetaia’i i tatou e ni lagona e faamasino, e filifili mea e talia pe teena i o tatou olaga, i le ekalesia ma nuu. E masani ai o a tatou faamasinoga e toe fesi’ita’i, o uiga fa’aalia ua tatou maua mai isi tagata, o isi taimi ma isi nofoaga, ina ia faatāua le iloilo e filifili ai mea e taofi ina ia faafailele le ola lelei i le lalolagi o tatou i ai nei. E tele faataitaiga o nuu ua uma ona latou ui mai i fetauaiga, sauaga ma faiga lē amiotonu, ona latou potopoto lea, tuu ese feeseeseaiga ae galulue ina ia fausia nuu e avea ai le alofa e sui ai sauaga o se olaga masani. Mata o le taimi o le seleselega moni lenei a le Atua: o le taimi ua faataatia ese ai le faaituau ma le manatu faapito ae sui i le alofa i le tuaoi, ma le faatumauina o le faigamalo o le Atua - o le filemu i le lalolagi mo tagata uma.

†”Le Atua o le upu moni uma lava, ia e faasaoloto a’u mai a’oa’oga ma amio tuai ma fesoasoani mai ia ou vaaia o’u tuaoi ma lau foafoaga atoa e pei ona e silasila i ai. Amene.

† Mo mafaufauga atili: Mafaufau i le tala o lou lava olaga. O a ni mea sa e fiafia muamua i ai ae ua lē toe i ai se uiga? E faapefea le faigatā ona tuu atu o ia mea?

Aso Faraile 2 Oketopa

Vaaia le Atua i le olaga masani Mata.13:44-58

“^{57e}E leai se perofeta e lē mamalu, ua na o lona lava nuu ma lona aiga e lē mamalu ai.”

I la matou ekalesia i Niu Sila i le tele o tausaga, sa matou filifilia ai ni faifeau tamaitai se toatolu, e leai se tasi na fanau ma tupu a’e iinei, ua faamanatu mai e tusa ma le Tusi faitau o lenei aso, le faigata ona iloa le tagata o tatou sailia ia i latou e sili ona latalata mai ia i tatou. Ua faia e Iesu le faamatalaga o perofeta ma taitai e amanaia i soo se mea vaganā ua lata i le aiga; e lē itiiti foi le sa’o i le tala i tina ma tamaitai e avea ma taitai i totonu o tatou ekalesia. O se lē agavaa e vaai ma iloa tua atu o mea masani i lo tatou lava siosiomaga, e mafai ona faapogisā ai la tatou vaai ma iloa le oloa tāua, o le Atua o loo galue latalata mai i o tatou talaane. I se a’oa’oga mo faia’oga i se a’oga iinei, na fesiligia faiaoga ina ia tusi uma i lalo igoa o tamaiti i a latou vasega. Na amata i le vave ona gaioi o peni a o faasolo mai igoa i le mafaufau, ae faasolo ina tuai le tusi ona o igoa ma foliga o nisi tamaiti ua lē faigofie ona manatua: o se su’esu’ega faa-faatinoga na iloa ai e oo lava i faiaoga e sili ona lelei, latou te lē amanaiaina tamaiti filemū ma lē gāoiā, ma latou misia ai taleni o loo natia ma tamaiti o i ai le faamoemoega e ausia mea silisili i le lumanai.

O nei faataoto o le faamanatu mai ia tatou mataitū, mata’alia ma mataala ina ia aua ai nei sopoloa la tatou vaai i tulaga o i ai le Atua. Tatou te manaomia ma tatalo mo se lalolagi filemu, ae o le tulaga malie i lo tatou naunauta’iga tatou te misia ai nofoaga o galulue ai i latou o tausifilemu ma le lē leoa: o e taulamua i fonotaga o faamasinoga toefuataiina, o foma’i tatou te iloa o loo galulue ma Doctors Without Borders, Riding for the Disabled, ma isi faalapopotoga fesoasoani. Ua tatou masani ma le toatele o i latou; e faapefea pe ana tatou vaaia i latou o penina o le tala lelei, o upega e tutumu i meaalofoa a le Atua, ua faaalua manino ai le faatuina o le afioga o le Atua i le mea tonu o tatou i ai?

†Le Atua o le foafoaga ma tagata uma, ia e faia a’u ia matala pea e vaai ma iloa poo fea o

galue ai lou Agaga. Ia faailoa mai pe faapefea ona ou auai ma faasoa i lena galuega. Amene.

†Mo mafauauga atili: E mafai ona vaaia le galuega a le Atua o faia e isi tagata e lē o se vaega o la outou faalapopotoga faalefaatuatua?

Aso Toonai 3 Oketopa

Malologa a le Atua – mea moni o loo ola ai

Tusi Faitau: Mataio 14:1-12

“Ona tiga ai lea o le tupu; a ona o le augani, ma e ua tatooto e aai faatasi ma ia, ua ia poloai atu e avatua. ¹⁰Ona auina atu ai lea e ia se tasi, ua vavae mai le ulu o Ioane i le fale puipui.”

I lenei vaiaso sa tatou feiloai ai ma Iesu ao lu'iina o la talu ai lana tausiga mo e fia 'a'ai, na teena ana aoaoga ma fesiligia lana misiona faamalolo; o le a lea ituaiga malologa? Atonu o se maufetuunaiga faaleagaga na te lagolagoina i tatou o a mea tatou te fesaga'i, o le loloto o le faatuatua na te faatagaina i tatou e faanoanoa, e faasasao poo le a le ituaiga tali atu, e pule tatou pe a ogaoga tiga o le soifuaga. Ou te taumate poo le mea lea na ia lagolagoina Iesu ma ana uo a o latou maua le tala i le oti matautia o Ioane ma latou tanumia o ia ma le filemu. A o avea au ma tamaitiiti a'oga o le Aoga Aso Sa, na puipuia mai le faailoa o ni lagona, o lenei tala sa na o se fagogo, e mamao, e leai se moni o i ai. Peitai mulimuli ane, ona avea lea ma tala e matuā moni. Ou te manatua le taimi, ina ua ou maua se meli e mana'omia ai lo'u tatalo mo se aiga faatuatua ua maliu se atalii i se auala faapea, na amata ai ona ou malamalama i le moni o lenei tala mai anamua. Sa leai se mafanafana o le taimi poo le mamao i lea itula, e lē mafai ona sola ese mai le aafiaga; na o loimata ma le mumū o mōlīsela la te faamatalaina a'u tatalo i ona foliga. Sa avea ma faamanatu ia te au e leai se mamao poo se taimi - e oo i se faatuatua - na te puipuia i tatou mai le loloto o puapuga faaletagata, pe mai le moni o upu ma faamatalaga e lē mafai ona faamatala le ogaoga o mea tatou te oo i ai. Atonu o le taimi lea e avea ai le faatuatua o se tatalo e olaina, e iloa atu ma e moni, e tino mai ai le faamoemoe o le Atua i se tautinoga e soifua i le alofa faatasi ma o tatou tuaoi tusa poo le a le tau.

†Le Atua e, ia e faatuputeleina lo'u talitonu, ina ia aoaoina a'u e alofa i o'u tuaoi e pei ona e alofaina a'u ma ia 'aau ou te fefe.

TALAAGA O TOA EFKS - UELE LOTU UELE FS

O molimau o lona soifua na toe tolaulau ai nisi o ana matati'a na ausia, o lona soifua tausaaafia ae maise lana tautua matavela mo le Alii o Iesu. Sa autasi molimau o Lotu o se meaalofo a le Atua na faa-aupegaina i agavaa ma atamai e fesoota'i lelei ai ma isi tagata, e ala lea i le lelei o lana tautalatala, saunoa, lauga, folafola, molimau, faamatala upu ma talanoa, ma le fa'aaogaina o lona fofoga fetalai e o faatasi ma ona foliga fiafia ma le tausaaafia, ae momoli atu e lona siufofoga malosia ma leomalie. O se auauna e finau mo le faatinoina ma le faataunuuina o mea silisili mo le manuia o soo se faamoemoe ma faai'uga fai; e lē mafai ona tali atu 'Leai' i se mana'oga, ae talitonu i afioga a le Alii o Iesu, e tatala mai pe a tu'itu'i atu, e maua pe a saili, ma le aoaoga a le aposetolo, na te mafaia mea uma ona o Ia o loo faatasi mai. O se auauna e saunia lelei i soo se taimi, i soo sana feau ma galuega e tofia i ai.

O se tagata foi e mau tofa i suaga malie i faasausauga ma evaga a le aufaigaluega; e mau upu e mau tali i soo se fesili ma soo se finauga; pe afai e le lava ana lalaga i se faatasiga, ona fofola lea o lana ie masani o tala o si ana manamea o Ane. E masani ona matua nisi ana lauga faamafanafana mo e ua maliliu i le fuaitau, *“²Ua oti Mose la'u auauna” (Iosua 1)*, na te folafola atu ai Afioga a le Atua faasino i le soifua auauna, soifua faatuatua, soifua tausaaafia o Mose le ta'ita'i ma le tagata o le Atua. Ona faataua mai lea i le soifua auauna o lē ua maliu, ma lana tautua i le Atua i ona tofi sa valaauina ai. E lē gata i lea ae folafola ai foi le uiga o le oti ma ona tiga, e tuufaafegai ma le olioli o le toetu manumalo o Keriso - o faamafanafanaga mo aiga ma uo pele ua motusia le mafutaga ma le auauna a le Atua o faasino tonu i ai le sauniga maliu. E faapea foi ona ia aumai ai ni lu'itau mo le fanau ma le aiga tainane le faapotopotoga tapua'i, ina ia tula'i mai nisi toa e sui tulaga i le toa ua mānava ana feau. O se matua ma se fuaitau lenei ua talafeagai tonu e fai ma molimau i le soifua o lenei tamā, le uso ma le uo ina faapea ane, *‘Ua oti Lotu Uele le auauna a le Atua’*. Sa faavae lona aiga i le upu a Iosua, *“A o au nei ma lo'u aiga, matou te auauna i le Alii.” Iosua 24:15*. Ia faamaise le Agaga o le Alii i le Faletua Penisione faanoanoa ia Ane ma le nofo a alo, o aiga uo ma le Ekalesia; ma ia i le Atua poto le viiga ma le mamalu ona o le soifua o lana auauna. (Ane Uele, Iese Uele FS & FSulu)

SOLOMONA **TUATAGALOA FT**

O le Sauniga Lotu Afiafi o le Aso Sa 23 Aokuso, a le EFKS Vaiteleta na lolotu faatasi ai ma le tino malia o le Toeaina Penisione ia Solomona Tuatagaloa. Mulimuli ane ona momoli atu lea o lona sa i lona aiga i Vaiteleta lava ma faia ai lona Sauniga Faaleaiga, na taitaiina e le susuga Siolo Tauati FT. O le Aso Gafua na sosoo ai na fai ai lona Toe Sauniga i le Maota Faasausau o Letoa Sefo Pa'u i Tafaigata. Na taitaiina e le susuga Muao Su'a FS ma saunia le Lauga faamafanafana; o Talosaga na saunia e le susuga Clay Tofilau FS, o le Tusi Paia na faitauina e le susuga Aoao Malua o Vaafuti Savea. Ona faaiu lea i le faailu efuefu o le tino malia o le toeaina. E i ai le talitonuga o le uluai faifeau toeaina leni ua faailu efuefu, e ui ina sa i ai foi nisi faifeau sa muamua faia i ai leni auala, e ese mai le auala aloaia ua taliaina e le Ekalesia-o le tanumia i le tuugamau. O le auunaga faapitoa leni o loo a'oa'oina ma galue ai se tasi o alo o le toeaina, ua ia sauni foi e faatuina leni atina'e/ auunaga i Amerika Samoa, ma atonu o le ala lea ua finagalo ai le tina ia Aneli (sa finagalo malie i ai le toeina) e faailu efuefu lona tino malia.

O le susuga i le Toeaina Penisione sa lauiloa e le Ekalesia i lona soifua galue malosi, e le gata i le faatinoga o le galuega faaleagaga, ae faapea foi i le faia o lana faatoaga. E fiafia ma to'aga e alu i lana pasika, poo le pikiapu Amerika e la'u mai fua o le faatoaga i taimi o seleselega, ma tufatufa fua atu i aiga o lana Aulotu faapea lana Pulega. E lauiloa foi pe a oo i taimi o faiga taulaga a le Ekalesia, i lona

faamalosi ma taulamua e fai taulaga silisili ma lelei mo le Atua e ala i le Matagaluega Faasaleleaga. O se Faifeau sa galue malosi mo le manuia o fanau e ala i Aoga Aso Sa ma Autalavou, ma to'aga e fai lana Aoga Faifeau. E fiafia tele e tali malo i le Ofisa Aoaga Kerisiano ma isi faalapopotoga o itutino eseese o le Ekalesia, pe a fai ni Mafutaga ma polokalame i Savaii. O se Toeaina e fai tala malie ma tausaaia, e alofa ma faapelepele i lana Aulotu, o Faifeau ma Faletua o lana Pulega. E fa'aaloalo tele ma lagolago i le Laulau ma le Komiti o ana aumea ma paaga Toeaina ma Faletua i le Matagaluega Faasaleleaga ma le Komiti Au Toeaina.

O Solomona o se tasi o tusitala o le Sulu Samoa; e fiafia tele e fesoasoani ma lagolago mai i leni foi vaega o le galuega e tala'i atu ai le Tala Lelei ia Iesu Keriso - e ala i ana tala pupuu ae malie ma 'anoa mo le fanau, ae a'oa'oina ai ma le au matutua. E oo mai nei o loo fai pea leni auunaga lelei e le Toeaina e ui ina ua Penisione - o lana tala mulimuli o loo faaulutalaina, E TIGA AE MANAIA - o le igoa lea o le Maota o le Galuega (Hall) na la'ua fausia a o galulue ai i le EFKS Lalomalava. O se fuaitau talafeagai foi leni e molimau ai lona soifua galue sa tautua ma auuna ai mo lona Alii, e ui ina tiga ae o le i'uga e manaia, ina ua taunuu atu o faafeiloa'i mai e lona Matai, "*Le auuna lelei e, ma le faamaoni...ina ulufale mai ia i le fiafia o lou Alii.*" Aue! ua maliliu toa, ua maumau ai aupega o le taua! Ia alofa le Atua faamafanafana le Tina Penisione ma fanau ua motusia le mafutaga. (F.Sulu mo Anneddy & Muao FS)

UA FAI ILAGI...

MOLIPŌ MAPOSUA **LIGI VAO** **(21/4/1962 – 6/8/2020)**

Na soifua mai le tina ia Molipo i le aso 21/04/1962, ae na valaau le Atua ma faamanava feau i le aso 06/08/2020 ina ua 58 tausaga o le soifua. O ona toe sauniga sa faia i lona aiga i Pupula i Laulii lava. O au sa taitai, o le tina ia Lusi Maposua Ligi Vao na molimau i le mafutaga ma le afafine, o le susuga i le Aoao Fesoasoani ia Tuautu Saumalu na molimau e fai ma sui o le fanau e molimau i le mafutaga ma le tuafafine, ae o Molipo laititi sa fai ma sui o fanau o e na ia faafailele i ona lima, faatasi ai ma lana uo sa o la galulue faafaiaoga, na molimau i lona olaga galue o se faiaoga ma le sa Pule Aoga. E auga uma lava molimau o ia o se tamaitai loto alofa ma loto tele e finau mo lona aiga ma lana galuega, ma e le ma faagaloina lava i loto ma manatu.

O le faletua ia Sina Tuautu na fai ma sui o le mafutaga a tina, ma na faa-autu le molimau i le upu a Paulo i le ekalesia i Kalatia e faapea "*Aua nei faapalapala i le amio lelei, auā a oo i ona po e tatau ai tou te selesele mai ai manuia, pe afai tou te lē faavaivai.*" Auā lava foi o ia o se auuna sa galue malosi i le tauaveina o tofiga e tele sa ia galue ai i le mafutaga a tina, aemaise foi i le itupa o tamaitai. Sa faa-autu le molimau a le faifeau i le upu a Ruta ia Naomi e faapea, "*aua e te finau ia te au ina ia ou tuulafoai ia te oe,*" auā e ui lava ina gasegase, ae sa finau malosi lava ona o le tautuaina o si ona tina ma lona aiga, aemaise i le

O E UA FAI I LAGI LE FOLAUGA

LEITŪ TAFAGA

ELISE SIOTA

(27/1/33 – 22/7/2020)

Na soifua mai le tina i le aso 27/01/1933, peitai na valaau le Atua ma faamanava feau a le tina ina ua latalata i le 88 tausaga o le soifua.. O se tasi o tina matua, ma tina talosia o lenei ekalesia auā e lei mamao atu foi nai taimi ua lē mafai ai ona toe auai mai i tapuaiga faitele ona o le soifua ua afu, peitai tatou te talitonu lava o la latou tapuaiga lē leoa i maota ma laoa, lea e manuia ai faiva o le au galulue O ona toe sauniga sa faia lava i lona maota i lona aiga i Laulii lava ona o nei foi aso ma poloaiga a le malo ona o faamai feagai ma le lalolagi. O au lava sa taitai, o le susuga i le Aoao Fesoasoani ia Tuautu Kalepo sa feagai ma talosaga. O le Afioga i le Alo o le Sao ia Fuamatu Tumua na saunoa e fai ma sui o le fanau e molimauina le mafutaga ma le tina. Sa ia taua ai o se tina sauā, ae o le sauā ona o le alofa ia i latou o le fanau ma lona aiga. E lē manao lava o ia ae

MOLIPŌ MAPOSUA

LIGI VAO

ekalesia i le mafutaga a tina, ma le aufaipese sa galue ai. O galuega lelei uma lava sa tautua ai ua faia uma lava ia galuega ona o le Suafa o le Alii, ua mapu nei ma malolo i le Malologa Paia, e pei o le autu o le feau faa-le-agaga o lea aso. O au lava foi na taitai i ona toe sauniga i lona oliolisaga tumau, ma o matou faamavae atu ai i le pese faa-tofa a le au kerisiano. Manuia lau malaga.

Pita Toleafoa FS,

EFKS Laulii, APIA SASA'E

faaletonu se mea e tapenaina e lana fanau ma lona aiga i faalavelave uma o ona aiga. O ana aoaoga ma faataitaiga lea ua manuia ai le toa sefulu ma le tasi o lana fanau, ma le 48 o a latou fanau, faatasi ai ma le 107 o fanau a fanau.

O le faletua o le Aoao Fesoasoani ia Sina Tuautu Kalepo, o le Taitaifono foi o le mafutaga a tina na fai ma sui o le mafutaga e faia le molimau o le soifua galue o le tina i le mafutaga a tina i le ekalesia. Sa taua ai, o le tele o taimi o lona soifua i le mafutaga a tina, o le itupā o Tausi. Ma o le tele o taimi e oo mai nei lava ua fai ifo le malosi ma lē toe gafatia ona auai mai i le tele o potopotoga a le mafutaga ma lo latou itupa o Tausi, sa savalia lava e tausi o Tuisamau e fesiligia lana tofa i le tele o mataupu. O lana tofa sa maopoopo ai ma toamalie lea foi itu o le mafutaga

O le molimau faa-le agaga sa faa-autu i le upu o loo i le tusi o *Galuega 20:24 "A ou te lē manatu i se tasi mea, o lou ola foi ou te lē naunau i ai, sei ou faauma lou momoe ma le olioli, atoa ma le faiva na ou maua mai le Alii o Iesu, ou te molitino atu le tala lelei o le Alofa tunoa o le Atua."* Auā sa matuā naunau e tau atu i lona aiga le tala lelei e soifua ma ola ai, ua oo mai lava le valaau e le o faavaivai lana e aoao atu. Maua lava foi na ia faaipoipo i le aso 4/3/1967, ae na au saili i le tausaga e 1985 ma ekalesia ai lava, ae o le aso 25/8/85 na faaetia ai lo la tofi tiakono ma galulue ai seia oo ina valaau le Atua i le tama.

O le feau foi o le aso lea sa faaagaina ai lava le tusi faitau o lea aso 2 Timoteo 4:8 "*O lenei*

ua teuina mo au o le pale o le amiotonu, e foaiina mai ia te au i lea lava aso e le Alii le faamasino Amiotonu, e lē gata foi ia te au, ae o i latou uma lava o e fiafia i lona faaali mai". Ua pale le tina ina ua taunuu lana ia tausinioga, ae fai foi mo i tatou lea pale, pe afai lava tatou te taufetuli ma le faatuatua i le Alii. O au foi na taitai i sauniga faaii i lona tuugamau ma matou faatofa atu ai i le pese faatofa a le au Kerisiano. Tofa tina manuia lau malaga.

Pita Toleafoa, FS

EFKS Laulii, APIA SASA'E

OSIGA FEAGAIGA

EFKS CANELY VALE

AUSETALIA

O le Osiga Feagaiga a le EFKS Canely Vale, Niusauelese Ausetalia, ma lo latou faifeau susuga Faasao Maa mai Siufaga Falelatai ma le faletua ia Airona mai Tufutafoe ma Faleapuna, na faataunuuina i le Aso Toonai, 12 Setema 2020. O lea sauniga na faia i le malumalu o le EFKS Fairfield, na ta'ita'iina e le toeaina susuga Siaki Brown FT. O le susuga i le Faifeau ma le Faletua na i'u mai le Kolisi Faafaifeau Malua i le tausaga 2019. Ia manuia le galuega.

FAASA'OGA O ATA!

Faamolemole, e asuasua vaimālū i finagalo o le mamalu tele o le Ekalesia ma le au faitau Sulu Samoa, ona o le faaletonu o le Ata o le Au Faauu i le Itulau i Luma o le Sulu Samoa Aokuso 2020. Ua toe lomina iinei (pg16) le isi ata ina ia silafia manino faifeau ma faletua.

O E UA FAI I LAGI LE FOLAUGA



MOLIPO MAPOSUA LIGI VAO



LEITU TAFAGO A ELISE SIOTA

FAIFEAU MA FALETUA FAAU'U 2020



Faifeau mai le agavale: Kara Siaosi Ipuniu, Faau BJ Faau, Risisone Taua, Ututau Siolo, Samata Iusitini
Leiloa, Francisco Fatu, Iese Lotu Uele, Nouata U. Saifoloi, Fiamalua M. Peleseuma
Faletua Laina i tua, mai le agavale: Eirenei Faau, Suitupe Taua, Fa'ao Saifoloi
Laina i luma: Tuluiga Ipuniu, Olive Fatu, Sia'eauli Uele, Faapisa Peleseuma, Samaria Siolo.